


**Odsjek za industrijsko inženjerstvo i menadžment
Mašinskog fakulteta Univerziteta u Sarajevu
organizovao drugi event za razvoj
preduzetničkih kompetencija studenata**

Odsjek za industrijsko inženjerstvo i menadžment Mašinskog fakulteta Univerziteta u Sarajevu organizovao je 17.11.2021. godine drugi od planirana četiri eventa u 2021. godini za studente sa ciljem razvoja preduzetničkih kompetencija kod studenata na praktičnim primjerima iz stvarnog života. Na svakom od četiri skupa studentima će se obratiti uspješni preduzetnici koji će studentima ispričati svoju preduzetničku priču.

Predavač na drugom eventu je bio vlasnik kompanije „El Company d.o.o.“ iz Visokog g. **Ejub Begović**, magistar mašinstva – diplomirani inženjer mašinstva. Ejub Begović je 2017. godine završio master studij na Odsjeku za Industrijsko inženjerstvo i menadžment Mašinskog fakulteta Univerziteta u Sarajevu. Trenutno, Ejub Begović je student doktorskog studija na Odsjeku za industrijsko inženjerstvo i menadžment Mašinskog fakulteta u Sarajevu.



Ejub Begović je istakao značaj studija na Odsjeku za industrijsko inženjerstvo i menadžment Mašinskog fakulteta u Sarajevu u razvoju preduzetničkih kompetencija, te kako je u privatnom sektoru važno prihvatiti koncept učenja i nakon završenog fakulteta kako bi se osiguralo efikasno i efektivno poslovanje.



„EL company d.o.o.“, firma u cjelokupnom privatnom vlasništvu, osnovana je 2015. godine. Nakon probnog perioda na tržište Bosne i Hercegovine izlazi ozbiljnije tokom 2016. godine, a nedugo nakon toga poslovanje širi i van granica Bosne i Hercegovine. U samom početku „EL company“ je proizvodio i razvijao proizvode iz vrtnog asortimana i asortimana bliskog vrtnom uređenju. Napredujući u poslovanju „EL company d.o.o.“ fokus svog djelovanja prebacuje na „Uradi sam“ namještaj kao što su sklopive noge za stolove, sklopive stalaže, višenamjenski namještaj i slično. U saradnji sa partnerima sa tržišta EU „EL company“ počinje razvijati i proizvoditi namještaj za kućne ljubimce poput kućica za pse i druge životinje, kokošinjce, ograde za kućne ljubimce i tome slično.

Trenutno „EL company“ djeluje i na trećem, gore srodnom, polju i to dizajnirajući proizvode među kojima se naročito ističe izložbeni namještaj, kao što su police i stalaže za specifične proizvode, prilagođavajući proizvod mogućnostima serijske proizvodnje. „EL company“ od 2020. godine radi isključivo na principu B2B poslovanja, surađujući sa veleprodavcima koji dalje raznim kanalima robu distribuiraju do krajnjeg korisnika. Svi zaposleni, a kojih je trenutno preko 56, konstantno rade na poboljšanju kapaciteta i kvaliteta proizvodnje čineći „EL company“ poželjnim partnerom i poslodavcem.

Studenti su pokazali veliki interes za ovakvim vidom prenosa iskustva i znanja u vezi sa preduzetničkim kompetencijama, te iskazali interes da na Fakultetu treba organizovati više ovakvih eventa.

Dijelovi teksta o kompaniji su preuzeti sa web stranice <https://elc.ba/>